

AWDURDOD TÂN AC ACHUB GOGLEDD CYMRU

Cofnodion cyfarfod **Awdurdod Tân ac Achub Gogledd Cymru** a gynhaliwyd **ddydd Llun 20 Ebrill 2026** ar **Teams**. Dechreuodd y cyfarfod am **09.00**.

Cynghorydd

Dylan Rees (Cadeirydd)
Mark Young (Dirprwy Gadeirydd)
Carol Beard
Tina Claydon
Paul Cunningham
Ann Davies
Jeff Evans
Ian Hodge
Alan Hughes
Chris Hughes
John Brynmor Hughes
Gareth R Jones
Charlie McCoubrey
Gwynfor Owen
Arwyn Herald Roberts
Austin Roberts
Gareth A Roberts
Rondo Roberts
Paul Rogers
Gareth Sandilands
Gareth Williams
Antony Wren

yn cynrychioli

Cyngor Sir Ynys Môn
Cyngor Sir Ddinbych
Cyngor Bwrdeistref Sirol Conwy
Cyngor Sir y Fflint
Cyngor Sir y Fflint
Cyngor Sir Ddinbych
Cyngor Sir Ynys Môn
Cyngor Sir y Fflint
Cyngor Sir Ddinbych
Cyngor Bwrdeistref Sirol Conwy
Cyngor Gwynedd
Cyngor Bwrdeistref Sirol Conwy
Cyngor Bwrdeistref Sirol Conwy
Cyngor Gwynedd
Cyngor Gwynedd
Cyngor Bwrdeistref Sirol Conwy
Cyngor Gwynedd
Cyngor Bwrdeistref Sirol Wrecsam
Cyngor Bwrdeistref Sirol Wrecsam
Cyngor Sir Ddinbych
Cyngor Gwynedd
Cyngor Sir y Fflint

Hefyd yn bresennol:

Dawn Docx
Helen MacArthur
Justin Evans
Anthony Jones
Dafydd Edwards
Gareth Owens
Matt Powell
Elgan Roberts
Steve Morris
Llinos Evans
Paul Kay
Elin Hughes
Heledd Davies
Lisa Allington
Ffion Evans

Prif Swyddog Tân (PST)
Prif Swyddog Tân Cynorthwyol (PSTC)
Prif Swyddog Tân Cynorthwyol (PSTC)
Prif Swyddog Tân Cynorthwyol (PSTC)
Trysorydd
Clerc a Swyddog Monitro
Dirprwy Glerc a Swyddog Monitro
Pennaeth Cyllid a Chaffael
Pennaeth TGCh
Pennaeth Cyfathrebu Corfforaethol
Pennaeth Diogelwch Tân
Hyrwyddwr Diwylliant
Gwasanaethau Cyfieithu Atebol
Gwasanaethau Aelodau
Cynorthwydd Gweithredol

Dechreuodd y cyfarfod am 09:00 gyda sesiwn hyfforddi yn ymwneud ag Atal a gwaith gyda phobl ifanc.

1 YMDDIHEURIADAU

Cynghorydd

Bryan Apsley
Chrissy Gee
John Ifan Jones

yn cynrychioli

Cyngor Bwrdeistref Sirol Wreccsam
Cyngor Sir y Fflint
Cyngor Sir Ynys Môn

YN ABSENNOL

Cynghorydd

Marc Jones
Beverley Parry-Jones
Dale Selvester

yn cynrychioli

Cyngor Bwrdeistref Sirol Wreccsam
Cyngor Bwrdeistref Sirol Wreccsam
Cyngor Sir y Fflint

Cynigiwyd a derbyniwyd yr ymddiheuriadau uchod.

2 DATGANIADAU O FUDDIANT

- 2.1. Datganodd y Trysorydd fuddiant yn Eitem 19, Rôl y Trysorydd (Swyddog adran 151).

3 HYSBYSIAD O FATERION BRYD

- 3.1 Nid oedd unrhyw hysbysiadau o faterion brys.

4 COFNODION CYFARFOD AWDURDOD TÂN AC ACHUB GOGLEDD CYMRU A GYNHALIWDYD AR 19 HYDREF 2026

- 4.1 Cyflwynwyd cofnodion cyfarfod Awdurdod Tân ac Achub Gogledd Cymru (yr Awdurdod) a gynhaliwyd ar 19 Ionawr 2026 i'w cymeradwyo.
- 4.2 Cynigiwyd y cofnodion fel adlewyrchiad cywir o drafodion y cyfarfod. Eiliwyd y cynnig ac roedd pawb o blaid.
- 4.3 Nododd y Cadeirydd, mewn perthynas â pharagraff 4.3 yn ymwneud â'r newidiadau arfaethedig i lywodraethiant awdurdodau tân ac achub yng Nghymru, y pasiwyd y ddeddfwriaeth i wneud hyn gan Lywodraeth Cymru ddiwedd mis Mawrth 2026.
- 4.4 **PENDERFYNWYD:**
- i) **Cymeradwyo cofnodion cyfarfod yr Awdurdod Tân ac Achub a gynhaliwyd ar 19 Ionawr 2026 fel cofnod gwir a chywir o'r cyfarfod a gynhaliwyd.**

5 ADRODDIAD Y CADEIRYDD

- 5.1 Nodwyd bod yr Aelodau eisoes wedi derbyn papur ysgrifenedig yn rhoi gwybod iddynt am y cyfarfodydd a'r digwyddiadau y bu Cadeirydd a Dirprwy Gadeirydd yr Awdurdod ynddynt yn eu capasiti swyddogol rhwng Ionawr a Mawrth 2026.
- 5.2 Atgoffodd y Cadeirydd yr Aelodau y bydd y dathliad 30 mlynedd ers sefydlu Gwasanaeth Tân ac Achub Gogledd Cymru (y Gwasanaeth) yn cael ei gynnal rhwng 12:00 a 14:00 yng Ngorsaf Dân Gymunedol y Rhyl ddydd Mercher 22 Ebrill 2026 ac anogwyd pawb i fynychu'r digwyddiad pwysig hwn.
- 5.3 **PENDERFYNWYD:**

i) Nodi'r wybodaeth a roddwyd yn y papur.

6 ADRODDIAD DIWEDDARU'R HYRWYDDWYR DIWYLLIANT

- 6.1 Cyflwynodd y Prif Swyddog Tân yr adroddiad diweddaru a oedd yn rhoi trosolwg i Aelodau o'r gweithgareddau a'r ffrydiau gwaith diweddar a arweiniwyd gan yr Hyrwyddwyr Diwylliant. Croesawyd Elin Hughes, un o'r Hyrwyddwyr Diwylliant, i'r cyfarfod.
- 6.2 Gofynnwyd sut yr oedd y systemau a'r prosesau ar gyfer gwella diwylliant yn cael eu hymwreiddio yn y tymor hir er mwyn sicrhau gwelliant parhaus. Ymatebodd y PST fod datblygu'r Dangosyddion Perfformiad Allweddol yn rhan hollbwysig o'r ymwreiddio hwn. Mae ymgynghori ar y Dangosyddion Perfformiad yn digwydd ar hyn o bryd ac mae gwaith gyda Chyrff Cynrychioliadol ar y gweill i sicrhau eu bod yn ystyrlon i bawb. Bydd y dangosyddion perfformiad wedyn yn mynd gerbron cyfarfod nesaf y Bwrdd Gwella Diwylliant ym mis Mai 2026 lle byddant yn cael eu mabwysiadu'n ffurfiol ac yn cael eu hadrodd arnynt fel rhan o'r adroddiadau perfformiad safonol i'r Aelodau.
- 6.3 **PENDERFYNWYD:**

i) Nodi'r rhaglen o welliannau sy'n cael ei harwain gan yr Hyrwyddwyr Diwylliant.

7 ADOLYGIAD O'R DDARPARIAETH FRYS

- 7.1 Cyflwynodd PSTC Anthony Jones bapur ar yr Adolygiad o'r Ddarpariaeth Frys a oedd yn rhoi ddiweddariad i Aelodau'r Awdurdod ar waith ar yr Adolygiad a sefydlwyd mewn ymateb i'r argymhelliad o gyfarfod 20 Ionawr 2025 bod swyddogion yn parhau i ddyfeisio a phrofi datrysiaidau amgen gyda chyrff cynrychioladol, o fewn y gyllideb y cytunwyd arni, er mwyn mynd i'r afael â darpariaeth frys mewn lleoliadau gwledig.

- 7.2 Gofynnodd un o'r Aelodau a oedd y gostyngiad mewn goramser yr adroddwyd yn ei gylch yn gynaliadwy yn y tymor hir, ac ymatebodd PSTC Jones ei fod. Bellach cwblhawyd tri mis cyflawn cyntaf y peilot ac er y bydd angen cyfnod o 12 i 24 mis i asesu'r effaith yn llawn, roedd y taflwybr o ran cynnal y gwelliannau yn edrych yn gadarnhaol.
- 7.3 Gofynnwyd a fyddai unrhyw effaith ar y peilot yn sgil cynnydd posibl mewn galwadau wrth i'r tymor tanau gwyllt agosáu, ac os felly a oes unrhyw ffigurau y gellid eu darparu i'r Aelodau ar gyfer y gorsafoedd niwclews.
- 7.4 Ymatebodd PSTC Jones fod cynllunio argaeledd dyddiol yn sicrhau bod yr argaeledd 18 pwmp yn ystod y dydd yn cael ei gynnal, a bod hyn wedi'i gyflawni ar 100% o achlysuron ers dechrau adrodd. Roedd y Gwasanaeth yn gallu gwneud rhywfaint o ragfynegi o ran digwyddiadau tanau gwyllt ac mae'r peilot yn darparu gwell man cychwyn gan ei fod yn lleoli staff amser llawn mewn ardaloedd gwledig lle nad oedd unrhyw ddarpariaeth yn flaenorol.
- 7.5 Cadarnhaodd PSTC Jones ymhellach fod y ffigurau ar gyfer Dolgellau a Phorthmadog ar gael ond nad oeddent wrth law ar hyn o bryd ac y byddent felly'n cael eu hanfon at yr aelodau y tu allan i'r cyfarfod.
- 7.6 Nododd Aelod mai prif bwrpas gwaith yr Adolygiad o'r Ddarpariaeth Frys oedd gwella'r ddarpariaeth mewn ardaloedd gwledig a gofynnodd a oedd y Gwasanaeth yn fodlon bod y gwelliant yn agosáu at y targedau a osodwyd ac a oes cynnydd i'w weld.
- 7.7 Ymatebodd PSTC Jones fod yr Awdurdod eisoes wedi gosod safon o 18 pwmp yn ystod y dydd ac er y llwyddwyd i gynnal hyn bob amser, roedd cost gwneud hynny'n uwch yn flaenorol. Un o orchwylion yr Adolygiad o'r Ddarpariaeth Frys oedd cynnal y safon 18 pwmp, ond mewn ffordd fwy effeithlon ac effeithiol. Roedd swyddogion yn falch bod hyn bellach yn digwydd a bod argaeledd yn gweithredu o fewn y cyllidebau presennol a staff yn cael eu defnyddio mewn ffordd fwy effeithlon ac effeithiol. Roedd gwerth cymdeithasol ychwanegol hefyd gan fod swyddi amser cyflawn bellach ar gael mewn ardaloedd lle nad oeddent o'r blaen, ac roedd hyn hefyd yn darparu cyfleoedd i staff ar alwad yn yr ardaloedd hynny symud i swyddi amser cyflawn.
- 7.8 Gofynnwyd pa wersi oedd wedi'u dysgu fel rhan o'r broses Adolygu a sut roedd y rhain yn cael eu hymwreiddio yn y gwasanaeth. Cydnabu PSTC Jones fod y Gwasanaeth wedi bod ar y daith hon ers 2023 ac y dysgwyd llawer yn ystod y cyfnod hwnnw, yn enwedig o ran gweithio gyda Chyrff Cynrychioladol. Roedd y berthynas waith hon wedi gwella, a hynny i raddau helaeth o ganlyniad i weithrediad y Cydgytundeb, ac mae arferion gwaith mwy proffesiynol ac effeithiol gyda'r Undebau Llafur yn awr wedi'u sefydlu. Roedd gweithrediad diweddar y Ddyletswydd Partneriaeth Gymdeithasol hefyd wedi ffurfioli'r gwelliant hwnnw mewn arferion gwaith.

- 7.9 Ychwanegodd y Prif Swyddog Tân fod y gwelliant hwn wedi bod o fudd i bawb a bod y berthynas rhwng y Gwasanaeth a'r Cyrff Cynrychioliadol bellach yn seiliedig ar barch i'r naill ochr a'r llall gyda hynny wedi arwain at ymagwedd llawer mwy cadarnhaol.
- 7.10 Gofynnodd Aelod a oedd y gostyngiad mewn goramser o ganlyniad i weithredu'r Adolygiad o'r Ddarpariaeth Frys wedi cael ei dderbyn yn dda gan y staff yr effeithiwyd arnynt, a dywedodd PSTC Jones ei bod yn ymddangos fod manteision y peilot yn gorbwyso unrhyw effeithiau negyddol.
- 7.11 **PENDERFYNWYD:**
- i) **Nodi bod swyddogion wedi parhau i weithio gyda chyrrff cynrychioliadol mewn partneriaeth gymdeithasol i ddatblygu ffordd ymlaen gyda'r Adolygiad o'r Ddarpariaeth Frys;**
 - ii) **Nodi bod cynnydd wedi'i wneud gyda lansiad cynllun peilot llawn y Cydgytundeb ar 1 Ionawr 2026; a**
 - iii) **Nodi y gwerthfawrogir ymdrechion parhaus yr holl barffion i fonitro ac adolygu'r peilot yn rheolaidd i sicrhau ei fod yn parhau i fod yn addas i'r pwrpas**

8 DIWEDDARIAD AR BROSIECT CANOLFAN HYFFORDDI CLWB AWEN

- 8.1 Rhoddodd PSTC Justin Evans grynodedeb o'r diweddariad ar Brosiect Canolfan Hyfforddi Clwb Awen, gan roi gwybodaeth am gynnydd mewn meysydd yn cynnwys gweithgaredd llywodraethu, statws y safle, cynllunio ar gyfer cyfathrebu ac ymgysylltu, ac ystyriaethau allanol sy'n dod i'r amlwg.
- 8.2 Cydnabu Aelod Hyrwyddo'r Ganolfan Hyfforddi waith caled y fîm a gofynnodd a ellid darparu diweddariad ar gyllid. Cadarnhaodd PSTC Evans fod y prosiect ar hyn o bryd yn gweithio tuag at gam 2 RIBA a fydd yn rhoi'r Gwasanaeth mewn gwell sefyllfa i gynnal y sgysiau cyllido angenrheidiol. Dywedodd y rhagwelir y cyrhaeddir cam 3 RIBA ddiwedd 2026 pan fydd y prosiect yn cyrraedd aeddfedrwydd dylunio, ac y disgwylir y penderfyniad porth 3 cysylltiedig tua mis Medi 2026. Ar y cam hwn byddai'r sefyllfaoedd risg a sicrwydd cysylltiedig â chost wedi'u sefydlu a phe na bai cyllid allanol wedi'i sicrhau, byddai'r aelodau'n cael eglurhad clir ar y sefyllfa a'r holl opsiynau, goblygiadau a risgiau cysylltiedig â phheidio â pharhau â'r prosiect.
- 8.3 Cadarnhaodd y Prif Swyddog Tân fod pecyn ymwybyddiaeth yn cael ei ddatblygu i ennyn cefnogaeth Aelodau newydd y Senedd yn dilyn etholiadau Llywodraeth Cymru ar 7 Mai 2026. Ychwanegodd y Cadeirydd fod cyfarfod eisoes wedi'i gynnal gyda Rhun ap Iorwerth, Arweinydd Plaid Cymru, cyn y cyfnod cyn- etholiadol, i esbonio'r risgiau sy'n wynebu'r Gwasanaeth a phwysigrwydd cyllid ar gyfer y prosiect hwn.

- 8.4 Nododd PSTC MacArthur fod grŵp cyllido'r ganolfan hyfforddi wedi'i sefydlu a bod y ffrydiau gwaith o fewn y grŵp hwnnw'n cynnwys gweithio gyda swyddogion Llywodraeth Cymru, dynodi pa wleidyddion y dylid ymgysylltu â nhw a chyfathrebu â phartneriaid sector cyhoeddus eraill.
- 8.5 Cyngorwyd yr aelodau bod y ffaith na chaniateir lobiö yn y cyfnod cyn-etholiadol wedi cyfyngu ar faint o fanylion y gellid eu rhannu ar hyn o bryd.
- 8.6 Gofynnodd Aelod am eglurhad ynghylch pa opsiynau fyddai ar gael pe na bai cyllid llawn ar gyfer y prosiect yn cael ei sicrhau. Cadarnhaodd PSTC MacArthur y byddai'r opsiynau hyn yn cael eu rhoi gerbron yr Aelodau fel rhan o iteriad nesaf y prosiect.
- 8.7 **PENDERFYNWYD:**

i) Nodi'r cynnydd sy'n cael ei wneud gyda Phrosiect Canolfan Hyfforddi Hwb Awen.

9 STRATEGAETHAU A DATGANIADAU ARIANNOL AR GYFER 2026/27

- 9.1 Cyflwynodd Elgan Roberts, Pennaeth Cyllid, ddogfennau'n rhoi gwybodaeth am y Strategaethau a'r Datganiadau Ariannol ar gyfer 2026/27: y Strategaeth Gyfalaf, Strategaeth Rheoli'r Trysorlys, a'r Datganiad Isafswm Darpariaeth Refeniw (MRP). Mae'r dogfennau hyn yn gosod y fframwaith ar gyfer buddsoddi cyfalaf, benthyca ac ad-dalu dyled.

9.2 PENDERFYNWYD:

- i) Cymeradwyo'r Strategaeth Gyfalaf;**
ii) Cymeradwyo'r Strategaeth Rheoli'r Trysorlys gan gynnwys dangosyddion darbodus; a
iii) Cymeradwyo Datganiad MRP Blynnyddol 2026/27.

10 STRATEGAETH ADNODDAU TYMOR CANOLIG 2026-30

- 10.1 Cyflwynodd PSTC MacArthur Strategaeth Adnoddau Tymor Canolig 2026-30 gan roi gwybodaeth i'r Aelodau am y fframwaith ariannol sy'n cefnogi cyflawniad Cynllun Rheoli Risg Cymunedol (CRMP) 2024–2029 a nodi rhagolygon ariannol tymor canolig yr Awdurdod, y risgiau a'r rhagdybiaethau cynllunio.

10.2 PENDERFYNWYD:

- i) Cymeradwyo Strategaeth Adnoddau Tymor Canolig 2026–2030.**

11 DATGANIAD POLISI TÂL 2026/27

- 11.1 Cafwyd crynodeb gan PSTC MacArthur o gynnwys y Datganiad Polisi Tâl ar gyfer 2026/27 sy'n nodi beth yw cyfrifoldebau Aelodau'r Awdurdod o dan Ddeddf Lleoliaeth 2011 (y Ddeddf).
- 11.2 Nodwyd bod y Ddeddf yn ei gwneud yn ofynnol i'r Awdurdod baratoi Datganiad Polisi Tâl blynyddol i'w gymeradwyo cyn dechrau'r flwyddyn ariannol y mae'r datganiad yn berthnasol iddi.
- 11.3 Cyngorodd PSTC MacArthur na chafwyd eto unrhyw arwydd clir y bydd y dyfarniad cyflog yn cael ei setlo. Roedd cynnig y Llyfr Gwyrdd (staff corfforaethol) wedi'i wrthod gan yr Undebau gyda thrafodaethau ar y gweill o hyd. Bydd unrhyw gytundeb dilynol yn cael ei ôl-ddyddio i 1 Ebrill 2026. Bydd y dyfarniad cyflog Llyfr Llwyd (staff gweithredol) yn weithredol o 1 Gorffennaf gyda thrafodaethau ar y gweill o hyd ynghylch moderneiddio cyflogau yn ogystal â chostau byw yn ystod y flwyddyn.
- 11.4 Roedd y swm a gynhwyswyd yn y gyllideb wedi'i osod ar sail disgwyliadau ar draws y sector tân ac roedd wedi'i alinio â'r awdurdodau lleol. Pe bai'r setliad yn arwain at ffigur uwch na'r ffigur a bennwyd wrth osod y gyllideb, mae rhywfaint o wydnwch mewn cronfeydd wrth gefn i ysgwyddo'r cynnydd hwn am flwyddyn yn unig. Y disgwyliad presennol yw 3.8%
- 11.5 **PENDERFYNWYD:**
- i) **Nodi gofynion Deddf Lleoliaeth 2011; a**
 - ii) **Cymeradwyo'r Datganiad Polisi Tâl ar gyfer blwyddyn ariannol 2026/27.**

12 CYNLLUN GWEITHREDU RHEOLI RISG CYMUNEDOL 2026/27

- 12.1 Cyflwynodd PSTC Anthony Jones y Cynllun Gweithredu Rheoli Risg Cymunedol ar gyfer 2026/27 a oedd yn rhoi trosolwg o'r adborth a gafwyd o'r ymgynghoriad cyhoeddus ar Gynllun Gweithredu Rheoli Risg Cymunedol 2026-27 a'r Asesiad o'r Effaith ar Gydraddoldeb cysylltiedig, a cheisiwyd cymeradwyaeth ar gyfer cyhoeddiad y fersiynau terfynol o'r dogfennau uchod.
- 12.2 **PENDERFYNWYD:**
- i) **Nodi cynnwys yr adroddiad Ymgynghori; a**
 - ii) **Cymeradwyo cyhoeddiad Cynllun Gweithredu Rheoli Risg Cymunedol 2026-27 a'r Asesiad o'r Effaith ar Gydraddoldeb cysylltiedig.**

13 DATGANIAD POLISI DISGRESIYNOL CYNLLUNIAU PENSIWN Y DIFFODDWYR TÂN

- 13.1 Cyflwynodd PSTC MacArthur bapur ar Ddatganiad Polisi Disgresiynol Cynlluniau Pensiwn y Diffoddwyr Tân, a oedd yn hysbysu'r Aelodau ynghylch yr angen i Reolwr y Cynllun, yr Awdurdod, gynhyrchu a chadw dan adolygiad Ddatganiad Polisi Disgresiynol Pensiwn y Diffoddwyr Tân
- 13.2 Atgoffwyd yr Aelodau ynghylch y penderfyniadau yn Datganiad Polisi Disgresiynol Cynllun Pensiwn y Diffoddwyr Tân a gymeradwywyd eisoes, yn gynnwys y cynnig bod penderfyniadau dydd i ddydd yn cael eu dirprwyo i swyddogion Gwasanaeth Tân ac Achub Gogledd Cymru (y Gwasanaeth), ar ran rheolwr y cynllun.
- 13.3 Er bod y Gwasanaeth wedi cyflwyno Datganiad Polisi Disgresiynol i'w gymeradwyo ym mis Gorffennaf 2025, er mwyn adlewyrchu'n gywir y mân newidiadau i adferiad buddion goroeswyr, o dan Reol C9 – Adfer Pensiwn Gweddwon, mae'r Gwasanaeth yn awr yn ceisio cymeradwyaeth i'r ychwanegiad isod gael ei gynnwys yn y polisi hwn a gymeradwywyd eisoes.
- 13.4 **PENDERFYNWYD:**
- i) **Cymeradwyo'r mân newidiadau sy'n cael eu cyflwyno ar gyfer adfer buddion goroeswyr, o dan Reol C9.**

14 BWRDD PENSIWN LLEOL CYNLLUNIAU PENSIWN Y DIFFODDWYR TÂN - ADRODDIAD BLYNYDDOL 2025/26 a'r CYLCH GWAITH

- 14.1 Cyflwynodd y Trysorydd adroddiad blynyddol y Bwrdd Pensiwn Lleol i Aelodau'r Awdurdod yn manylu ar y gwaith a wnaed yn ystod blwyddyn ariannol 2025/26, ynghyd â Chylch Gwaith y Bwrdd Pensiwn Lleol ar gyfer 2026/27.
- 14.2 Diolchwyd i'r Trysorydd am ei waith fel Cadeirydd dros y ddwy flynedd ddiwethaf, a diolchwyd i'r tîm Pensiynau am eu cefnogaeth.
- 14.3 **PENDERFYNWYD:**
- i) **Cymeradwyo Adroddiad Blynyddol y Bwrdd Pensiwn Lleol 2025/26; a**
- ii) **Cymeradwyo Cylch Gwaith y Bwrdd Pensiwn Lleol ar gyfer 2026/27.**

15 ADRODDIAD BLYNYDDOL TALIADAU CYDNABYDDIAETH COMISIWN DEMOCRATIAETH A FFINIAU CYMRU 2026/27

15.1 Crynhoedd Gareth Owens, Swyddog Monitro a Chlerc yr Awdurdod, Adroddiad Blynnyddol Taliadau Cydnabyddiaeth Comisiwn Democratiaeth a Ffiniau Cymru ar gyfer 2026/27 a hysbysodd yr Aelodau ynghylch y cyfraddau cydnabyddiaeth arfaethedig ar gyfer y flwyddyn ariannol 2026/27.

15.2 PENDERFYNWYD:

- i) Nodi penderfyniadau'r Comisiwn Democratiaeth a Ffiniau ynghylch lwfansau a thaliadau cydnabyddiaeth aelodau o 1 Ebrill 2026; a**
- ii) Rhoi awdurdod dirprwyedig i'r Clerc ddiweddarau'r atodlen o daliadau cydnabyddiaeth aelodau yng nghyfansoddiad yr Awdurdod ac i wneud unrhyw newidiadau angenrheidiol i atodlen 2026/27 o bryd i'w gilydd yn ystod y flwyddyn ddinesig, i adlewyrchu unrhyw newidiadau yn aelodaeth yr Awdurdod, neu o ganlyniad i unrhyw adroddiadau atodol a gyhoeddir gan y Comisiwn Democratiaeth a Ffiniau.**

16 PENODI AELOD ANNIBYNNOL I WASANAETHU AR BWYLLGOR SAFONAU'R AWDURDOD

16.1 Argymhellodd Gareth Owens i'r Aelodau eu bod yn penodi David Davies i Bwyllgor Safonau'r Awdurdod, a darparwyd y cefndir i'r broses benodi.

16.2 Nododd Aelod ei bod yn anodd argymhell rhywun i swydd pan nad oedd unrhyw wybodaeth gefndir wedi'i darparu. Rhoddwyd sicrwydd ynglŷn â phrofiad a sgiliau David Davies, a nodwyd bod y Cynghorwyr Dylan Rees a Gareth Sandilands ar y panel penodi a bod y ddau wedi argymhell y penodiad.

16.3 Dywedwyd wrth yr aelodau y byddai proses recriwtio arall yn cael ei rhoi ar waith er mwyn llenwi'r ail swydd wag ar y Pwyllgor Safonau, ac y byddai dwy swydd wag arall yn codi ym mis Medi 2027.

16.4 PENDERFYNWYD:

- i) Penodi David Davies am gyfnod o bedair blynedd o 20 Ebrill 2026 ymlaen; a**
- ii) Diolch i Julia Hughes a Sally Ellis am eu gwaith caled a'u hymrwymiad.**

17 ALLDRO DROS DRO 2025-26

17.1 Cyflwynodd Elgan Roberts bapur ar Alldro Dros Dro 2025-26 i'r Aelodau a oedd yn rhoi'r wybodaeth ddiweddaraf am ragolygon gwariant cyfalaf a refeniw 2025/26, fel y oedd ar 31 Mawrth 2026.

- 17.2 Mewn ymateb i gwestiwn cynharach gan Aelod ynglŷn â'r effaith yr oedd y cynnydd mewn costau tanwydd yn ei chael ar y gyllideb a sut roedd hynny'n cael ei reoli, cadarnhaodd Mr Roberts fod prisiau nwy a thrydan wedi'u gosod ar gyfer y pum mlynedd a'r ddwy flynedd a hanner nesaf, yn y drefn honno, gan roi sicrwydd o ran costau. Ar hyn o bryd mae'r Gwasanaeth yn y broses o ddatgarboneiddio'i fflyd trwy symud i ffwrdd o ddisel i drydan a dechrau defnyddio tanwydd Olew Llysiau Hydrogenaidd (HVO) ar gyfer offer gorsafoedd a thrwy hynny leihau'r ddibyniaeth ar symudiadau yn y farchnad ac unrhyw gynnydd dilynol mewn costau tanwydd.
- 17.3 Gofynnwyd ymhellach sut yr oedd y cynnydd yn cael ei reoli mewn amser real. Dywedodd PSTC MacArthur fod cynnydd chwyddiannol yn cael ei gwmpasu o fewn y gyllideb bresennol ond os bydd costau'n parhau i godi, efallai y bydd angen gwneud cais am ddefnyddio cronfeydd wrth gefn. Mae'r hinsawdd economaidd bresennol hefyd yn effeithio ar gyfraddau benthyca a bydd yn rhaid ystyried hyn. Nid yw argaeledd tanwydd ar hyn o bryd yn effeithio ar y Gwasanaeth o safbwynt weithredol ac mae'n cael ei reoli'n fewnol. Cadarnhawyd pe bai cyflenwadau tanwydd yn dechrau achosi problemau, y byddai personél a cherbydau'r gwasanaethau brys yn cael eu blaenoriaethu.
- 17.4 **PENDERFYNWYD:**
- i) **Nodi'r sefyllfa alldro refeniw a'r llithriad cyfalaf rhagamcanol ar gyfer blwyddyn ariannol 2025/26, fel y manylir yn yr adroddiad;**
 - ii) **Nodi'r risgiau sy'n gysylltiedig â'r alldro dros dro a chydabod bod y ffigurau rhagamcanol yn yr adroddiad hwn yn ddarbodus;**
a
 - iii) **Cymeradwyo'r symudiad i/o'r cronfeydd wrth gefn a glustnodwyd a'r gronfa gyffredinol.**

18 MATERION BRYS

- 18.1 Nid oedd unrhyw faterion brys i'w hystyried.

Cynigiwyd y dylid symud y cyfarfod i Ran II i drafod y papur yn ymwneud â Rôl y Trysorydd (Swyddog Adran 151). Eiliwyd y cynnig ac roedd pawb o blaid. Gadawodd pawb â buddiant yn yr eitem hon y cyfarfod.

Dechreuodd RHAN II y cyfarfod am 11:14.

19 RÔL Y TRYSORYDD (SWYDDOG ADRAN 151)

- 19.1 Rhoddodd y Trysorydd drosolwg o gefndir y cynnig hwn a dywedodd wrth yr Aelodau ei fod yn ei lwyr gefnogi. Wedi hyn, gadawodd y Trysorydd y cyfarfod.
- 19.2 Cyflwynodd y Prif Swyddog Tân y papur ar Rôl y Trysorydd (Swyddog Adran 151) a chadarnhaodd y byddai hyn yn symudiad at fodel tebyg i un Gwasanaeth Tân ac Achub De Cymru - model y mae

Gwasanaeth Tân ac Achub Canolbarth a Gorllewin Cymru hefyd yn bwriadu ei fabwysiadu.

19.3 Ychwanegodd y Prif Swyddog Tân y byddai contractau cyflogaeth yn cael eu diwygio yn unol â hynny.

19.4 **PENDERFYNWYD:**

- i) **Cefnogi'r trefniadau arfaethedig ar gyfer mewnoli rôl statudol Swyddog Adran 151 ac argymhell bod y penodiad yn cael ei gymeradwyo gan yr Awdurdod llawn ar 20 Ebrill 2026; ac**
- ii) **Awdurdodi'r Clerc i ddiweddarau cyfeiriadau at y Trysorydd yn y Cyfansoddiad yn unol â hynny.**

Daeth RHAN II y cyfarfod i ben am 11:20.

Diolchwyd i'r Aelodau a'r Swyddogion am eu cyfraniad.